

Китобхонлик – буюк келажак кафолати

Маълумки, илм-маърифатли бўлишнинг энг асосийси омили – китоб ўқишдир. Дарҳақиқат, китоб ўқиш қалб чигалликларини ёзади, кўнгилга хузур бағишлайди, жаҳолатга барҳам беради, турли-туман васвасаларни киши онгидан қувиб чиқаради. Китоб – ҳаётнинг қоронғу йўлларида ёритиб боровчи чироқдир! Кўп китоб ўқийдиган инсон ҳаётда улкан муваффақиятларга эришади.

Машҳур саҳоба ҳазрати Али каррамаллоҳу ваҷҳаху шундай деганлар:

أَقْلُ النَّاسِ قِيَمَةُ أَقْلُهُمْ عِلْمًا

яъни: “Инсонларнинг энг қадри ози – илми озидир”.

Илмсизлик, жаҳолат инсониятни тубанликка, ҳалокатга олиб бориши муқаррар. Инсонлар илм орқали Парвардигорларини танийдилар. Дунё ва охираатларини илм билан обод қиладилар.

Ҳасан ибн Саҳл раҳматуллоҳи алайҳ шундай деганлар: “Маъмун ухлаганда атрофида китоблари турар эди. Ухлашдан олдин ҳам китоб ўқир, уйқудан уйғониб кетганида ҳам китоб ўқир эди. У шундай деб кўп насиҳат қилар эди:

اسْتَعِنَ عَلَى وَحْشَةِ الْغُرْبَةِ بِقِرَاءَةِ الْكُتُبِ، فَإِنَّهَا أَلْسُنٌ نَاطِقَةٌ وَعُيُونٌ رَامِقَةٌ

яъни: “Ёлғизлик гурбатини китобларни ўқиш билан енггин. Зеро, китоблар сўзлагувчи тиллар ва тикилиб турувчи кўзлардир”.

Буюк аждодимиз Амир Темури хам: “Китоб – барча бунёдкорлик, яратувчилик ва ақл идрокнинг, илму-донишнинг асосидир. Ҳаётни ўргатувчи мураббийдир”, – деганлар.

Ўтган машҳур уламолардан Абул Фараж Ибн Жавзий китоб мутолаасига бўлган муҳаббати ҳақида шундай дейди: “Мен ўз ҳолим ҳақида айтадиган бўлсам, китоб мутолаасидан ҳеч тўймаганман. Агар ўзим ўқиб кўрмаган бирор китобни кўриб қолсам, гўё хазинанинг ичига тушгандек бўлиб қолардим. Агар мен: “йигирма минг мужаллад китоб ўқиб чиққанман” десам ҳам, муболага қилган бўлмайман, лекин китоб ўқишда давом этяпман”.

Доноларимиз: “Китобларни ёқиб юбориш оғир жиноят, бироқ дунёда ундан-да оғирроқ жиноят бор, у – китоб ёқмаслик”, – деганлар.



Ҳурматли юртдошлар! Китоб – бу қимматли мерос, уни баҳам кўриш эса инсоннинг энг олижаноб фазилатларидан биридир. Шу сабабли Адлия вазирлиги мамлакатимизда маънавиятни юксалтириш ва китобхонлик маданиятини ривожлантириш мақсадида республикаimizдаги давлат хизматлари марказларида китоб алмашиш учун махсус “зиё улашиш” бурчакларини ташкил этмоқда.

Китоб улашиш – бу китобларни эркин алмашиш маданиятидир. Биз ҳар биримиз ўқиган китобимиз билан бошқаларни ҳам хабардор қилиш, илмга қизиқтириш ва ўзаро билим алмашиш имкониятига эгамиз. Адлия вазирлиги ушбу маданиятни кенг оммалаштириш мақсадида 2024 йил “Зиё улаш” акциясини бошлади. Дастлабки босқичда адлия тизими ходимлари ўзлари ўқиб бўлган китобларни ихтиёрийлик асосида келтириб топширдилар. Ушбу китоблардан республикаimiz бўйлаб 200 дан ортиқ маҳалла кутубхоналари ташкил қилинди. Эндиликда ушбу ташаббусга кенг жамоатчиликни ҳам жаб қилиш мақсадида лойиҳани янги босқичга олиб чиқиш кўзда тутилган. Бу ташаббус:

- Китобхонликни оммалаштириш;
- Жамиятда ўзаро ҳамжиҳатлик ва ҳурматни ошириш;
- Ёш авлодни билимга чанқоқ қилиб тарбиялаш каби эзгу мақсадларга қаратилган.

Ҳурматли жамоат! Биз сизларни ушбу эзгу ташаббусга қўшилишга чақирамиз. Қуйидаги йўллар орқали ёрдамнингизни қўшишингиз мумкин:

- 1. Китоблар ҳадя қилиш:** Ўзингиз ўқиган, лекин ҳали бошқаларга фойдаси тегиши мумкин бўлган китобларни давлат хизматлари марказларидаги “Зиё улаш” бурчакларига олиб келинг.
- 2. Атрофдагиларни “Зиё улаш” ташаббусини қўллаб-қувватлашга чақириш:** Дўстларингиз, ҳамкасбларингиз ва бошқа давлат ташкилотлари ходимларини ушбу ташаббусда иштирок этишга даъват этинг.
- 3. Тарғиб қилиш:** “Зиё улаш” бурчакларининг афзалликлари ҳақида яқинларингизга айтиб беринг, ижтимоий тармоқларда улар ҳақида ёзинг.

Аллоҳ таоло барчамизга билим ва маърифат ато қилсин, фарзандларимизни зиёли халққа фойдали солиҳлардан бўлишини насиб қилсин, илму маърифатда пешқадам бўлгани аждодларимиз изидан боришни барчамизга насиб айласин! Омин!

